

# ADAMONIN WŌN BUCH MOSES

ÑARANA Ā IJ EGEN BWE

## ŌAWIT IMIN.

### ITŪBAÑ 1.

**N**AGA ā eitsiök örig imin, Gott örig ianweron me eb.

2 Me eitsiök erig imin ñana bain eat eb, me eko ðañan; mi itūr emek animwet ijited; ma Anin Gott ömakamakur animwet ebök.

3 Me Gott ūge, Enim eað: me ea-ðen.

4 Me Gott āt iað bwo omo: me Gott öekae iað mi itūr.

5 Me Gott eijeget iað bwa Aran, me E ij eget itūr bwa Anübūmin. Ma antsiemerin ma antsioran ar eken ūrör adamonit ibūm.

6 ¶ Me Gott ūge, Enim tsimine firmament inimaget ebök, me enim ekae ebök atsin eat ebök.

7 Me Gott eririñ firmament, mō ö ekae ebök ñea ijōñin firmament atsin eat ebök ñea itūgain firmament: mō ūgan.

8 Me Gott eij egen firmament bwe Ianweron. Ma antsiemerin ma antsioran ar eken ūrör karabūmit ibūm.

9 ¶ Me Gott ūge, Enim epoda ebök ñea ijōñin ianweron eat etañ emwarin, me enim meta emwarere ñea emōg: mō ūgan.

10 Me Gott eij eget emwarere ñea emōg bwe Eb: me E ij egen an epo ebök bwe Emago: me Gott aia mo omo.

11 Me Gott ūge, Eb enim örig ibūgibūgi, mi ibūgibūgi ñan ouwak ñan oqua quan, me imin erō n ðn quan ñan oqua quan ñan quan ökōr, ñan etsimine baban ian, eat eb; mō ūgan.

12 Me eb örig ibūgibūgi, me ibūgibūgi ouwak ñan örig quan ñan quan ökōr: me Gott aia mo omo.

13 Ma antsiemerin ma antsioran ar eken ūrör katijübūmit ibūm.

14 ¶ Me Gott ūge, Enim tsimine iað ianweron, bwe re nimō öekae aran

ma anübūmin; me re nim ek'ūra we-mat edae, mi ibūm, me eobweni:

15 Me re nim ek'ūra iað i ianweron bwe re nimō öeað eb: mō ūgan.

16 Me Gott eririñ aro iað ñan ouwak; bwe iað ñea ouwak eken enimō moniba aran, me iað ñea oniñ eken bwe enimō moniba anübmin: me E ririñ bet edetañ.

17 Me Gott ðñaeow ūra i ianweron bwe re nimō öeað eb,

18 Me bwe re nimō moniba aran ma anübūmin, mō öekae iað mi itūr: me Gott aia mo omo.

19 Ma antsiemerin ma antsioran ar eken ūrör keabūmit ibūm.

20 ¶ Me Gott ūge, Enim rig imin ñan ebak ñan ememōri, ñan etsimor iat ebök, me enimō ðaöeta imin öeta itūgait eb ijōñin ianweron.

21 Me Gott örig iūen imago ñan ouwak, me imin memak ñan etsimor ñan ememōri, ñana re mek iat ebök tekei eörūra, mi imin öeta memak tekei eörūra: me Gott aia mo omo.

22 Me Gott ögageidawianaw ūra, mō ūge, Amwaim karig mō öebak gamiā, ma amwaim ouquet ijited imago, me imin öeta re nimō öebak ūra eat eb.

23 Ma antsiemerin ma antsioran ar eken ūrör katimot ibūm.

24 ¶ Me Gott ūge, Eb enim örig imin ñan etsimor tekei eörūra, imin ñan öbōñöbōñ, me imin ñan ewewō, me imin gögōrō n eat eb ñan ökaredūñ tekei eörūra.

25 Me Gott eririñ imin gögōrō n eat eb ñan ökaredūñ tekei eörūra, me imin gögōrō ñan öbōñöbōñ tekei eörūra, me imin memak ñan ewewō añe tekei eörūra: me Gott aia mo omo.

26 ¶ Me Gott ūge, Aijūmō ririñ eñame tekei gadei, ma akeweöitei: me ri nan moniba ea iūen imago, mi imin

ōeta n ijōñin ianweron, mi imin ñan ōbōñōbōñ, me eat eb memak, mi imin ewewō memak ñan ewewō eat eb.

27 Me Gott ōrig eñame bwa akeweōin, Ō ōrig bwa akeweōin Gott; Ō ōrig ūra bwe eman me ān.

28 Me Gott ōgagedawianaw ūra: me Gott ūge a ūra, Amwam karig ōkōr mā amwaimō ōebak gamiā, mo oquet eb, mō ōdenigae, ma amwaimō moniba ea iñen imago, mi imin ōeta n ijōñin ianweron, me imin ñan ețsimor memak, ñan ewewō eat eb.

29 ¶ Me Gott ūge, Kania, A ogiten oija gamiā ibūgibūgi memak ñan oqua, ñan emek eat eb memak, me imin erō memak ñan ețsimine baban ian quan; ōañamiā kōr mūñane:

30 Mi imin gōgōrō n eat eb memak, mi imin ōeta n ijōñin ianweron memak, mi imin ñan ewewō eat eb memak ñan ețsimine itsimor iara, A ogiten oija ūra ibūgibūgi memak ñan aditūr bwe ōñara: mō ūgan.

31 Me Gott aia imin memak ñan E ririñ, me, kania, togit omo. Ma antsiemerin ma antsioran ar eken ūrōr quañot ibūm.

## ITŪBANA 2.

**M**ō ōuga an og ianweron me eb, me baibain earōr memak.

2 Me ean quaeiut ibūm Gott oog an makur ñan Ō ogiten ririñ.

3 Me Gott ōgagedawianaw quaeiut ibūm, mō ōebwigaga: bwina Gott ōnāno ean ñabūmina atsin ean an makur memak ñan O ogiten ōrig me ririñ.

4 ¶ Ñane nuawin ōrigen ianweron me eb ñaga ā ōrig, eat edae ñaga Jehova Gott ōrig eb mi ianweron.

5 Me eitsiōk tsimine imin erō ñan jeiji n eat ețañ in kiāō eat eb, me eitsiōk erōda bet ibūgibūgi n ōñ ñana būgibūgi n eat ețañ in kiāō: bwe Jehova Gott eitsiōk pan ie enim et weron eat eb, me eko bet eñame ñea ōgapaeda eat emwarere;

6 Mo orogan eat eb āo mō ōriare emwarere memak.

7 Mi Jehova Gott ōrig eñame atsin ean badetsin emwarere, me E jiwedu ian gadetsin bodit ōnāno n tsimor; me eñame ekejiyen anin ñea ețsimor.

8 ¶ Mi Jehova Gott ōijōt ețañ in kiāō emwarin edōgen apoe, i Eden; mō Ō ñaeowen ina eñame ñea O ogiten ririñ.

9 Mi Jehova Gott ōmarūmida imin erō memak atsin eat emwarere, ñan omo aiaeōra, me ñana imin-ōn quan; mi imin erō n tsimor bet eōen iju-gagain mūmwarina ețañ in kiāō, me mūena imin erō n tsiet emo mi ibaka.

10 Mō ōgōrūrō ekaw atsin Eden bwe enim ōriare mūmwarina ețañ in kiāō; mō ōmwiñ ina, me ekejiyen aeoq mwīnen.

11 Egen ñea adamonin bwe Pison: ñea ōpaeoi eb memak ñabena Hevila, ino ețsimine gold;

12 Mo omo gold in minebena eb: ețsimine bedellion me epe ñana onyx.

13 Me egen karot ekaw bwe Gihon: ñea ōpaeoi eb ñabena Chus.

14 Me egen katijut ekaw bwe Hiddekel: ei ñea ōgōrūrō edōgen apoin Assyria. Me kataeoqit ekaw ei Euphrat.

15 Mi Jehova Gott ōnuaiw amea, mo Ō ñaeow eat ețañ in kiāō Eden bwe e nim ōijōn me raña.

16 Mi Jehova Gott ōpan a amea, mō ūge, Wo kona n ōñ kōr quat imin erō memak ñan ean mūmwarine ețañ in kiāō:

17 Me wo nim eō jeiji atsin eat imin erō n tsiet emo mi ibaka: bwe ean ñabūmina wo jeiji atsin ean, wo nan ima kōr.

18 ¶ Mi Jehova Gott ūge, Eō deri eñame ñune i' te ei; A nimō ririñ a buoken ion ñea eiwin a.

19 Mi Jehova Gott eririñ atsin eat emwarere imin gōgōrō n añe memak, mi imin ōeta n ijōñin ianweron memak; mō ōrean a amea bwe enim aia eg keken ñan e emwinōn ūra: mi tamo eg ñan amea emwinōn mūñana imin, nan egōra kōr.

20 Ma amea eij eget imin gōgōrō memak ñan ōbōñōbōñ, mi imin ōeta n ijōñin ianweron, mi imin gōgōrō n añe ñan ōkaredūōñ memak; me ā eitsiōk bet kona dañan amea ion ñea eiwin a.

21 Mi Jehova Gott ōraijedu a amea imijimij ion oaiō, me e mijimijen;

mo O rouda barügirügita emaan, me E tsimaeön mûmwarina etañ duwen:

22 Mi Jehova Gott eririñ mima-na eparügirüg ñaman O roudan ean amea me eket añ, mô Ö ðrean añen amea.

23 Ma amea üge, Rön rô kör ñune ñage, me duwet duwô: mi inan ij egen bwe An, bwina ā barü atsin eat Eman.

24 Me ñagat eñame enimô ñaünit etôñin mi inen me ereribe a agen: ma ar nan ek'ürör duwen ñea aiquen.

25 Me eko böneät duwörör, amea ma agen, ma ar eö gadükürañ bet.

### ITÛBANÑ 3.

ÖMAT eket schlange ea imin gö-görô n añe memak ñana Jehova Gott ogiten ririñ. Mô ö üge a äita, Iduwen ða iök ñana Gott üge, Amwarüm eö ðn quat imin erô memak ñan ean mûmwarine etañ in kiäö?

2 Me äita üge a bita schlange, Amar kona n ðn quat imin erô ean mûmwarine etañ in kiäö:

3 Mô üge añöget imin erô ñaäen erô ijugagain mûmwarine etañ in kiäö, bwe Gott üge, Amwarüm eö ðn, ma amwarüm eö towe bet, bwa ñam amwar ima.

4 Me schlange üge a äita, Ekeow bwa amwar eab ima:

5 Bwe Gott etsiet bwe ean ñabûmin amwar ðn, nat adö memürör, ma amwar nan ta tsitö a Gott me tsiet ñan omo me ñan ebaka.

6 Me ñaga äita aia müena imin erô bwe eiwin a ia ā ðn quan, mo omo aiaen, me ñaga ā aëñ müena imin erô iö ömat eñame, ö ramwit quan mô öten; mo o oija bet agen, ma amea öten bet.

7 Me eadön mörör arumen aeög, ma ar tsietin bwe eko aquöret iwugagarör; ma ar tsir ren ficus ma ar eken aquöret iwugagarör.

8 Ma ar kaiöt aen Jehova ñag edügidügo eat etañ in kiäö ean enamwmen aran: ma amea ma agen ar ewewin ürör atsin ian men Jehova Gott inimaget imin erô ean mûmwarina etañ in kiäö.

9 Mi Jehova Gott emwemwin amea, mô üge a, Iñ auwe?

10 Mô ö üge, A kaiöt aem eat etañ in kiäö, ma A miow, bwe eko aquöret iwügaga; ma A ewewinön.

11 Me Gott üge, Ijegen öpan aw ñan eko aquöret iwugagam? Wo öten quan müena imin erô, ñaäen A pan aw bwe wo nim eö ðn?

12 Ma amea üge, Äita ñea Wo ome bwe dañö oija ame quan ñaäena imin ma A öten.

13 Mi Jehova Gott üge a äita, Adaga wo ririñ ñune? Me äita üge, Schlange ederügaiö ma A öten.

14 Mi Jehova Gott üge a schlange, Ñaga wo ririñ ñune, nan ouwak eken öeögidaen gaim ea imin gögörô n añe memak ñan öböñöböñ, mi imin gögörô n añe memak ñan ökaredüñ; wo nan ewewö ean bwereton ijem, me wo nan kö badetsit emwarere ean am bûm in tsimor memak:

15 Ma A nan ñaeow eaijeni inimagem me äitune, mi inimagen am karig ma an karig: Amea nan jorgageñ tübûm, me wo nan jorgageñ rübögin nanan.

16 Mô Ö üge a äita añ, A nan ouwak magaüm ia wo jeñ; wo nan örig ñaim iat emaga; me wo nan te ebon agem, mi i nan moniba ea aw.

17 Mô Ö üge a Adam, Ñaga wo ogiten kaiöt aen agem, mô ðn quan müena imin erô ñaäen A pan aw, mô üge, Wo nim eö ðn: ā öeögidan gait emwarere bwe dögûm; me wo nan kona ðañam iat eroe ean am bûm in tsimor memak:

18 Me inan örig akanthos me eökön bwe magöm; me wo nan ðn bügibügün añe ñana imin-ön;

19 Wo nan ijeiji ean eamoñ in mem, ea am tik redö a emwarere; bwe ā barü auwe atsin ean: bwa auwe kör emwarere; me wo nan tik redö a emwarere.

20 Ma amea eij egen agen bwe Eva; bwini ei inöra memak ñabûna re tsimor.

21 Mi Jehova Gott eririñ böneän Adam ma agen ñana witsit imin gögörô, mô öeduaeöten ürör.

22 ¶ Mi Jehova Gott üge, Kania, amune tekeijien ion eadel, ñag e tsiet emo mi ibaka; me ñage, bwe e nim eö kan ere ben me ramwit bet

quat imin erō n tsmor, mō ōn, me tsmor eō toki:

23 Me űagan Jehova Gott ōijōt atsin ean mūmwarina etañ in kiāō Eden, bwe e nim kiāō ean bita emwawere űea ā barū atsin ean.

24 Me E ededegerida amea; mō Ō űaeowen űabūna cherubim edōgen apoit etañ in kiāō Eden, me pwiō-riōrit ipudutūbwin űaran eiwiwidō, bwe enim oberei medenan mūena imin erō n tsmor.

BAIN ŌKŌR ETARAMAWIR

À ADŪMEI IOW ITŪRIN  
AMERICAN BIBLE SOCIETY

ÑABŪN AMEN ŌBĀBARROW BIBEL EAT EB

NEW YORK